

33-

DISSERTATIO GRADUALIS,  
STRICTURAS QUASDAM CRITICAS  
IN HISTORIAM ALANDIÆ,  
MARIS BALTI CI INSULÆ,  
CONTINENS.

QUAM  
CONS. AMPL. FAC. PHIL. ACAD. ABOENS.  
PRÆSIDE  
*Mag. JOHANNE BILMARK,*  
HISTOR. AC PHILOS. PRACT. PROFESSORE REG. ET ORD.


*Publice censuræ submittit*  
*DANIEL BACKMAN,*  
BOREA-FENNO,

IN AUDITORIO MAJORI DIE IX JUNII MDCCXCII,

H. A. M. C.

---

A BOE Typis FRENCKELLIANIS.





## P R A E F A T I O.

Stricturas quasdam Críticas in Historiam Alandiae,  
maris Baltici insulæ, in medium allaturo, dicam  
mihi forte non pauci scribent, quod argumentum dis-  
sertationis elegerim, ab aliis, eisdemque eximia sag-  
citate præditis, Viris ad umbilicum ita perductum, ut  
nihil, quod de isthae insula scitu dignum esset, ab eis  
prætermissam videatur. Sed sicut diversæ ejusdem  
regionis descriptiones non sunt infrequentes; ita nemo  
miretur, in Alandia illustranda studium plures ope-  
ramque collocasse; quo circa tamen ipsa argumenti  
tractatio ostendet, me de aliorum meritis, in eodem  
Historico campo ante me versatorum (*a*), nihil deli-  
basse, nedum ex eorum rivis mea penitus irrigasse  
arva. Praeterea haud dissimulabo, me non tam eri-  
ditionis, cuius tenuis mihi est supellex, quam pietatis  
potius meditari specimen; tanto enim dulcissimum  
natale folium meum complector amore, quanto pe-  
ctus boni civis unquam flagret, animoque proinde

A

meo

meo jugiter obversari monitum Poëtæ: *Sisque memor patriæ, quæ te genuitque, tulitque.* Atque ex hoc capite Tuam, Benevole Lector, mihi censuram expeto.

- (a) Postulat officium, ut in ipso dissertationis limine eos strictim nominem Scriptores, qui de Alandia ex professo commentati, ad nostram pervenerunt notitiam; in quibus recensendis seriem annorum, quibus sua consignarunt opuscula, sequar. Horum agmen ducit Elias Petri HASSELGREN, Alandus, cuius est oratione *encomium Alandiæ simpliciter & succincte adumbrans*, Aboæ an. 1662 in 4:o edita. Hunc proxime secutus est Christiernus ALANDER, natione Alandia Svecus, in Academia hac Aboensi Eloquentiæ Professor postea constitutus, qui ephebus nuper factus, Orationulam, *encomia & laudes Districtus insularis maris baltici ejusque incolarum mores, & descriptionem totius Alandiæ complectentem* an. 1678 in 4:o publici juris fecit. Vidi etiam apud Præsidem meum aliam de Alandia orationulam MSt, a quo & quando consignata, incertum; a prioribus vero plane diversam. Ex his scriptis parum proficiet Historicus. Luculenta autem est dissertatione Cl. Juvenis Laurentii O. HALLBORG, Westro-Gothi, de Alandia, cuius pars prior Præside Cel. Professore A. SCÄRIN An. 1730 in publicam prodiit lucem forma 8:o, sed qui telam a se ineptam, morte eodem anno præventus, pertexere non potuit. Posthac Cl. Christophorus TÅRNSTRÖM, Upplandus, binas de Alandia, maris Baltici insula, Upsaliæ in 4:o edidit dissertationes, priorem Præside Cel. Professore E. FRONDIN, an. 1739, alteram sub moderamine Cel. Professoris P. EKERMAN an. 1745. An. Cl. Tårn-

Cl. Tärnström nominatam Hallborgi disquisitionem viderit, incertum est, quum eam in suo Specimine Historico nusquam citet; certum vero est, quod multa cum eo habeat communia, quod eandem rem describentibus non potest non accidere. Elegans imprimis est descriptio Alandiæ (*Berättelse om Åland*), qua Oeconomiam Cameralem, quam a se consignatam, *Diario Oeconomico* (*Hushållnings Journalen*) an 1781 inferendam misit Dicasterii Regii Aboënsis Consiliarius & Eques auratus de Stella Polari, Nob. *D:us Samuel EHRENMALM*. Nuperrime etiam amicus meus *D. F. Mallén* in publicam emisit lucem dissertationis sue de *Parœcia Alandiæ Lemland*, eique annexa *Lumparland*, partem priorem,

## §. I.

Sita est Alandia in confinio maris Baltici ac Sinus Botnici, hæc maris brachia dirimens, propior Finlandiæ, quam Sveciæ, a qua per maris partem, Mare Alandicum appellatam, quinque circiter milliar. Svecan. amplitudinis distinguitur. Juxta communem loquendi usum dividitur Alandia in *terram continentem* (*Fasta Landet*) & *Insularem*; illa est insularum, huc pertinentium, maxima, quæ juxta recentissimam et accuratissimam Mappam Alandiæ Geographicam, cura Regii Coll. Camerae Consiliarii, Nob. *D:ni E. de WETTERSTEDT* an. 1789 Holmiae editam, in latitudinem a  $60^{\circ} 5'$  ad  $60^{\circ} 25'$  circiter boream versus extenditur, & in longitudinem ab Ekerö ad Bomarsund seu a  $37^{\circ} 9'$  (primo meridiano

in Insula Ferroensi constituto) ad 37° 50' fere, orientem versus exporrigitur, continentisque terrae maxima & latitudo & longitudo est ferme 3 $\frac{1}{2}$  mill. Svecan. areaque, comprehensis intermediis aquarum confluentibus, 8 milliar. Svecan. quadrat. adaequat; quae vero dimensiones evadunt majores, si sporadicæ simul in censum veniant insulæ Alandicæ; nec tamen area terræ ob copiam aquarum exacte potest definiri (a). Intra ambitum firmæ Alandiæ reperiuntur Sex parœciæ, nimirum computatione ab orientali parte facta, 1:o Parœcia *Sund* cum annexa *Wårdö*, templis sesquimiliariis fere spatio a se distantibus; 2:o Parœcia *Saltvik*, 3:o Parœcia *Finström*, cui annexa est *Geta*, ad radices montis ejusdem nominis sita; 4:o, Parœcia *Hammarland* cum sua annexa *Ekerö*, 5:o Parœcia *Jomala*, 6:o Parœcia *Lemland* cum annexa *Lumpaland*. Ad insularem vero Alandiam duæ pertinent Parœciæ 1:o *Kumblinge*, cum sua annexa *Brändö*; 2:o *Föglö* cum suis annexis *Kökar* & *Söttunga*. In hisce octo (b) Alandicæ parœciis ad tenorem census publici, an 1791 instituti, numerabantur Domania Regia, (*Kongsgårdar*) 3; prædia equæstria (*Såterier*) 5; habita insuper portionum virilium (*Mantalens*), ratione, in Alandia nunc reperiuntur Prædia libera (*Frälschenman*) 18  $\frac{1}{2}$ ; Vectigalia (*Skattchenman*) 196  $\frac{1}{2}$  (c) & Fiscalia (*Kronohemman*), 284  $\frac{1}{2}$ ; sed quæ in minora, prædia qua magnam partem sunt divisa (d).

(a) Nob.

- (a) Nob. M. GYLLENSTOLPE in *descriptione Sveciae Cap. XXIV* ponit longitudinem Alandiæ esse VII milliar. fere cum pari latitudine; quæ vero dimensiones sibi non constant, nisi cum terra continente simul comprehendatur insularum congeries; vel mensuræ factæ sunt juxta viam publicam. Præterea Cl. HALLBORG in *dissert. cit. p. 34* docet, Alandiæ longitudinem a gradu 41 incipere, ducem, ut videtur, secutus de WITT, qui primum meridianum occidentaliorem insula Ferroensi facit. Hallucinatur vero, statuens ambitum totius Alandiæ 29 circiter milliar. continere; quum idem, aslumatis etiam dimensionibus Gyllenstolianis, utpote maximis, 22 milliar. Svecan. non excedat.
- (b) Rev. D. BÅNG in *Histor. Eccles. Sveo Goth. p. 268* septem tantummodo parœcias Alandiæ tribuit, sed aut erratum heic occurrit typographicum, aut dormitavit hic Vir, in Historia Patriæ certe versatissimus. Rursus qui Concilio Ufaliensi an. 1593 subscripserunt Pastores Alandici memorantur novem, & inter hos Bero Laurentii de Geta, sed qui procul dubio fuit Sacellanus; quum nullus præterea Sacellani Alandenlis ibidem fiat mentio.
- (c) Hallucinatus igitur est Cl. TÄRNSTRÖM, in *Tabulae synopticae, dissertationi sua priori de Alandia præmissa*, prædia Alandica, si domania excipientur, Fiscalibus accensens omnia.
- (d) An. 1778, quo Cl. DJURBERG suam edidit Geographiam, numerum prædictum Alandiæ ponit 752. & hominum ibidem tunc degentium 10000, qui spacio duorum annorum ita increverant, ut an. 1780 ex calculo Nob. EHRENMALMI ibidem invenirentur 11302 homines.

## §. II.

Originem appellationis Alandiæ indagaturis tres obveniunt opiniones, animadversione quadam dignæ. Veteribus Alandis, ceu perhibet Rev. D. BÅNG (*a*), fuit persuasum, Reginam, qua nomen & tempus quo vixit, ignotam, ad Alandiæ scopulos fecisse naufragium, conspectaque inter natandum terra e longinquo, iterum iterumque graviter ingemuisse: *Ah! Land, Å-land*, atque hinc insulam suum fortitam fuisse nomen. Quisque autem facile perspicit, traditionem adeo vagam ad aniles referendam esse fabulas. Opinantur alii, insulam nostram, a Germanis olim frequentatam, eosque cum palantes heic cernerent *alcium*, a se *Elend* appellatarum greges, insulæ nomine *Elend*, *Aland*, quasi diceres *alcium terram*, indidisse (*b*). Sed nullam video rationem, quare denominationis ratio in lingua peregrina, Gothicæ licet cognata, sit quærenda; præfertim quum incertum sit, an Germani ad nostram insulam suas tñquam direxerint naves: quiequid autem sit, horum accessu antiquior habenda est Alandiæ appellatio. Nec mihi probatur etymon Alandiæ, ab *Å amne* & *land* terra petitum, quod intra Alandiam pauci occurrunt amnes. Rem acu tetigisset Nob. IHRE, observans, *Å* primitiva sua significatione aquam quamcunque denotasse, & hinc *Åland* dici quasi terram maritimam (*c*), si ex hac derivatione peculiaris quædam Alandiæ nota, genioque insulæ imprimis propria posset colligi. Missis autem aliorum opinionibus, breviter

ter observo, quod cum vocales ö, o, å, facile permittentur, nihil impedit, quin Åland dicta sit quasi Öland, terra insularis, quem titulum prae aliis meretur regionibus, etiam prae Ölandia; quum notum sit, sexaginta insulas habitabiles, ut de cæteris nihil dicam, ad Alandiam pertinere.

(a) Vid. *Histor. Ecclesiast. Sveo-Goth.* p. 298.

(b) *Liber modo citat.* p. 268.

(c) Vid. *Glossarii Svio Gotb.* p. 45. Tom. r.

### §. III.

Quamvis ut aliarum Patriæ nostræ regionum, ita etiam Alandiæ in vetustis monumentis rara occurrat mentio, silentii tamen populo hæc non fuit penitus involuta. Imo si sibi constet Historicorum opinio, primos Scandinaviæ incolas, avitis in oriente sedibus relictis, per Finlandiam, & dehinc, trajecto mari Alandico, in Sveciam penetrasse (a), hæc insularum series ab antiquissimis inde temporibus fuit cognita. Præterea ex Historiola, quæ *Origines Norrigiæ* inscribitur, discimus, GORRUM, Finlandiæ ac Quenlandiæ Regis THORERI filium, sororem GOAM, clanulum abductam, indagaturum, instructis triremibus & pluribus secum assumptis sociis, mare transnavigasse Alandicum (b). Me quidem non fugit, quod eandem probabilitatis adoream, qua olim inclinavit, huic historiolæ recentiores non tribuant Critici; licet vero om-

omnem examinis limam non sustineat, ad meras tamen haud referenda est ineptias; nonnulla quippe bonae frugis spicilegia continens.

(a) Inter alios consuli meretur Nob. P. J. SURM in libro: *Om de Nordiske Folks áldste Oprindelse* §. XVI. p. 18.

(b) Vid. citat. *Historiolam insertam BJÖRNERS Kämpa-dater* p. 2.

#### §. IV.

Alandos ejusdem esse cum Svecis prosapiæ (a), communis utriusque Nationis lingua satis superque indicat. Quo autem tempore primos Alandia nacta fuit incolas, silentibus Historicis, indagare non potui. Et licet hypothesin de immigratione populorum in Sveciam, in antecedente §, memoratam assuumam; ex ea tamen tuto non concluditur, migrantium turmarum quasdam, ab itineris sociis digressas, in Alandia, minus securam tunc præbente habitationem, confessisse. Probabilius videtur, alias aliasque familiæ Suecicas, post fractam piratarum, mare Alandicum infestum reddentium, ferociam, modo his, modo aliis exagittatas tempestatibus civilibus, vel comperta soli Alandici amoenitate allectas, ad nostras se sensim contulisse insulas. Et hanc populorum in Alandiam immigrationem æram antevertere introducere religio-nis Christianæ, probare videntur colles sepulcrales, in

in parœciis Hammarland & Finström præcipue obvii (b). Pererebuit quidem inter Alandos vetus traditio, thesauros sub his conditos esse collibus; sed vulgus, talia venditans, ineptire facile dedero; quum signa defossarum divitiarum non soleant constitui, nec spes, ex his opes obtinendi tumulis, animum ullius Alandi ad eos aperiendos haec tenus sollicitaverit.

(a) In Alandia occurunt non tantum Sacellum *Geta*, parœciae *Finström* annexum, sed etiam intra ejus ambitum pagi *ÖstGeta* & *WestGeta*; quæ vero nomina an memoriam veterum Getarum refricent, aliis dispiciendum relinquo.

(b) Constructionem horum tumulorum ad tempus gentilismi esse referendum, subinnuere videtur Cl. HALL-BORG in citat. *dissertat.* p. 61. not. d.

## §. V.

Alanos inter veteres populos & copiis potentes, & bellicarum expeditionum fama inclytos fuisse, nisi in antiqua historia plane hospitem, fugere potest neminem; qua autem ex terra, ceu solo suo natali, illi in conspectum primo, ac deinde in terrorem totius ferre Europæ eruperint, controversia est ad umbilicum nondum perducta. Antiqui Historici, quotquot de Alanis memoriae quid prodiderunt, eos ad Scythicam referunt gentem, & littora Ponti Euxini, dum Europæis primum innotuerunt, habitasse perhibent (a). Enimvero quum veteribus Scriptoribus fuerit sollempne, Scythicae

thicæ genti quosvis accensere populos, versus septemtrionem habitantes, cæterisque minus cognitos, ex eorum effato de origine ac primis Alanorum sedibus nihil certi potest concludi (*b*). Plenius in perplexo hoc argumento suam explicuisse mentem putatur PROCOPIUS, rerum Alanicarum præ multis aliis gnarus, afferens, *eos Gothicæ esse originis* (*c*); quocirca tamen eadem ferme occurrit ambiguitas, quum incertum sit, quos intelligat Gothos, vel Paludis Mæotidis accolas, vel Scandiæ incolas, inter se minime confundendos (*d*). Hoc tamen Procopii testimonio aliisque rationibus suffulti plerique Nostratum Antiquiorum, nominatim ADAMUS Bremensis (*e*), JOHANNES MAGNUS (*f*), MESSENIUS (*g*), BAZIUS (*h*), RUDBECKIUS (*i*), DALINUS (*k*), aliisque, veteres Alanos ex Alandia fuisse egressos putarunt; a quibus vero in tantum dissentit Nob. LÄGERERING (*l*), ut Gothiæ provinciam Hallandiam pro Alanorum habeat patria, nomen illius deducens a Gothicæ *Hall*, *Häll* monte; *Hallandia* proinde montosam, qualis revera est, regionem, & *Alanis* monticolas significantibus. Parem antea, qua appellationis etymon, opinionem foverat BAYERUS (*m*), nomen *Alanorum* deducens ab *alin*, quæ vox lingua Mungulica denotat *montem*, sed juxta monuit, veteres Alanos habitasse montes boreales Sarmatiæ Asiaticæ, a rebelli deinceps Hunnorum colonia avitis ejectos sedibus, ad Paludem Mæotiden se recepisse; cui etiam assentit Cel. DE GUL-

GNES

¶ ) ii ( ¶

GNES (n). Quamvis autem meum impense diligam natale solum, & Alandiae Nationis gloriae libenter velificem, vereor tamen, ne veritati vim inferam, si Alandiae, habitationem veterum Alanorum vindicare aggrediar; praeſertim, quum ad ductum Dni De GUIGNES, Alani prius e Scandia emigrassent, quam haec suos nocta fuisse incolas. Quam inter alias fuisse rationem praeſumo, quare Nob. SUHM, qui in varia Alanorum fata ſollicite admodum inquisivit (o), hos Scandinaviæ populis non annumeraverit. Quid? Quod JORNANDES, Gothorum in Italia Episcopus, natione licet ipfe Alanus (p), & rerum ſuæ patriæ optime gnarus, originem fuorum popularium reticeat, eam procul dubio explicaturus, fi vel per traditionem ei constitifset, eos ex Scanzia, vagina gentium a ſe appellata, fuisse egressos. Nec nos PROCOPII, Alanos ad Gothicam gentem referentis, moratur auctoritas, perſuafos quippe, eum in hanc ivisse opinionem, quod Alani magnam legionum Gothicarum olim constituerint partem. Denique in animum non possum inducere, quomodo vel Alandia vel Hallandia, regiones non magnæ amplitudinis, & olim parum habitatæ, numeroſa militum emittere potuerint agmina, ut reticeam, hos emissos, fi qui fuerint, Alanos vel Hallanos potius, quam Alanos levi quidem, notabili tamen nominum diſcrepanția, fuisse dicendos.

(n) Vid. DIONYSIUS Periegeta, V. 305. 308. PLINII Hist. Libr. IV. C. 19. p. 56. AMMIANUS MARCELLINUS Lib. XXX C. 2. PHILO Judeus lib. VII de Bello Judaico C. 29.

- (b) Notandum enim est, quod per Alanos non peculiarem quandam gentem, sed colluviem potius Nationum veteres designent scriptores, vid THUNMANNS *Untersuchungen über die Geschichte der östlichen Europäischen Völker*, p. 19.
- (c) Vid. libr. IV de bello Goth. C. 3, item de Bello Vandalico libr. 3 p. 309.
- (d) De hoc argumento conferatur Nob. LAGERBRING in *Histor. Svec. Tom. I* p. 544.
- (e) Alanos, Albinos etiam, quod canitie nascerentur, dictos fuisse commemorat, & inter Scandiae populos refert, vid. *Libr. de situ Daniæ, &c.* p. m. 59.
- (f) Vid. *Hist. Gotb. Svec.* p. m. 580.
- (g) Vid. *Scondiae illustratæ Tom. XIII* p. 17.
- (h) Vid. *Inventar. Eccles. Sveo-Goth.* p. 22.
- (i) Vid. *Atlanticæ Tom. I* p. 396 & *Tom. III* p. 326 seq.
- (k) Vid. *Hist. Svecan.* Tom. I. p. m. 20 not. f.
- (l) Vid. J. GRIMBÆCK *Dissert. de Hallandia in genere P. BRING edit.* p. 2 & 16. sed Nob. hic Polyhistor in *Historia Svecana* populos recensens, ex Scandia olim egressos, nullam Alanorum facit mentionem, ne quidem de Hallandia libr. cit. p. 327. speciatim differens.
- (m) Vid. *Schediasma insertum Actis Erudit.* Lips. an. 1731 p. 316.
- (n) Vid. *L' Histoire des Hans* lib. IV p. 279 seq.
- (o) Vid. libr. supra citat. p. 24. seq.
- (p) Hujus sui generis nos certiores facit ipse JORNANDES in lib. de rebus Geticis p. m. 134. unde infert Nob.

IHRE Prooemii ad Glossar. Svin-Goth. p. VIII probabile, JORNANDEM, genere Alanum, Candacisque Alanorum DUCIS Notarium, ante suam conversionem, Episcopi munus inter Gothos accepitrum non fuisse, si dissonam linguam usurpasset. Dubium tamen manet, an Gothicā lingua ei fuerit vernacula, an vero eandem in conversatione cum Gothis sibi reddiderit familiarem.

## S. VI.

Inclytum per Septemtrionem fuit *Templum Bjarmense*, Numini *Jomala* dicatum, non tam propter religiosum quendam cultum ei ibidem exhibitum, quam potius ob ingentem auri & argenti vim, intra aedis claustra reconditam. Quocirca Antiquariis data fuit occasio, in situum regionis, Bjarmiae nomine olim insignitae, inquirendi. Missis aliorum aliorumque de hac re opinionibus, quas examinare, instituti mei non fert ratio, prætermittere tamen non potui chorographicam hanc disquisitionem, quod Rev. D. BÅNG multis probare nitatur argumentis, *Bjarmiam* in Alandia esse querendam, cum quod mare Balticum promontorio Alandico dividatur in duo brachia, Sveth. *Arm*, quibus in littoribus Sueciæ respondent *Södre Arm* & *Norte Arm*, unde Germanice *bey-armia* & Svethice *Biarmia*, tum quod intra ambitum Alandiæ sit parœcia, *Jomala* dicta, hoc nomine olim insignita, quod ibidem coleretur numen *Jomala* &c. (a). Enimvero si in *Bjarmiam* contendentes, ductum sequamur veterum

rum Argonautarum (*b*), e Norvegia ad hanc Colchida peregre navigantium, recta pervenimus ad littora maris Albi, & sinum ubi fluvius Dwina se in dictum mare exonerat; quare etiam præstantissimi Historici veterem *Bjarmiam* fuisse hodiernam *Permiam*, & in hac Templum *Jomalense* exstructum, recte docent (*c*). Denique observandum, quod in Alandia non inveniatur templum, *Jomalæ* nuncupatum, sed parœcia ab hoc Numine appellata, forte ut Fennis, quorum frequentia cum Alandis olim fuerunt commercia, hoc gratificaretur modo.

(*a*) Vid. *Hist. Eccles. Sveo-G.* p. 267 seq.

(*b*) Vid. *Herraudi & Bosæ Hist. C. VII* & STURRON. *Heims Kringl.* Tom. I. p. 620 seq.

(*c*) Præter alios bene multos consuli in hoc argumen-  
to merentur LAGERBRING *Hist. Svec.* Tom. I. p. m.  
319. seq. & SCHÖNINGS *Försg till de Nordiske Landes  
gamle Geographie.* p. 8. 54, 64.

## §. VII.

Multis etiam fuit persuasum, veteres Sveciæ Reges, ut in aliis suis regionibus, ita in Alandia *Præfatos* con-  
stituisse *limitaneos*, a nostratis *Våringar* (*a*) dictos,  
qui hostium, præsertim piratarum, irruptiones, si va-  
lerent, statim reprimerent, sin minus, per ignes faltem  
angaros, imminens indicarent periculum. Forte talis Marchio in *Eckeroa* (*b*), quæ sit parœciæ Ham-  
mar-

*marland* annexa, suam olim habuit sedem. Ex similitudine vocum *Wåring* & *Wareger*, qua significacionem plane diversarum (*c*), antiquariis nata est occasio, in natales utriusque appellationis inquirendi; reiectis autem aliis etymologiis, Nob. *Lagerbring* præsumit, *Waregos* a locis Alandiæ *Warghamn*, *Warggata*, & *Wargsund* esse cognominatos (*d*). Sed obscuriora omni ævo hæc fuerunt loca, quam ut ab eisdem nomen sortiti sint *Waregi*; simplicius cum suis afferere potuisset antecessoribus, *Waregos* a Gothico *Warg*, *lupo*, vel *pirata*, fuisse appellatos (*e*). Enimvero quum *lupi* in Alandia rarius occurrant, nec veteres Alandi ob exercitam piraticam fuerint famosi, suspicatus sum, nomina horum locorum esse corrupta. Nec vana hæc fuit persuasio, saltem qua appellationem *Wargata*; a meo enim accepi Præside, quod cum per *Wargata* profectus, a rustico comite quæsivisset: an multi ibidem essent lupi, quippe quod nomen loci insinuare videbatur, hic responderit: nec ullos ibi esse lupos, nec locum istum *Wargata*, sed *hwargata* dicendum, propterea quod Alandi certis anni diebus per singulas plateas, (*hwargata*) illuc veluti ad commune confluenter forum. Rem acu tetigisse mihi videtur Nob. DALIN (*f*), existimans, ex *Sverige* factam esse *Waregiam*, prima littera S vel facilitatis pronunciationis ergo, ut putat Nob. IHRE (*g*), vel quod appellatio ista ad Russos per intermedios Fennos, geminam ab initio vocis non ferentes consonantem, olim fuerit transmissa.

- (a) Lautior deinceps facta est *Våringorum* conditio, cum in aulam Constantinopolitanam recepti, milites Imperatorum Græcorum agerent præsidarios.
- (b) Hoc ex *Historia de ODDONE* jaculatorie nos docet Cl. BJÖRNER in suo de *Waregis &c* Schediasmate p. 24; sed qui dubius hæret, an *Eckeroa* sit vel *Norvegiae* vel *Alandiæ* aſlerenda.
- (c) *Våring a Goth. Vårja* defendere, sed *Waregr a Warg* lupo vel pirata.
- (d) Vid. *Hist. Svec. Tom. I* p. 599.
- (e) Vid. in primis Cl. J. G. HELSINGI *Dissert. de origine prisci Gentis Waregorum.*
- (f) Vid. *Hist. Svec. Tom. I. p. m.* 303.
- (g) Vid. *Glossar. Svio-Goth. Tom. II.* p. 1069.

### §. VIII.

Nec hoc reticendum loco, quod de imagine & inscriptione, quæ in Sigillo Alandiæ territoriali occur-  
runt, in diversas Eruditi abeant opiniones. Ipsum  
Sigillum exhibent expressum Cl. HALLBORG (a) &  
Cl. TÅRNSTRÖM (b), quod sifst imaginem Regis, fo-  
lio insidentis, caput corona cincti, dextra bipennem,  
sinistra globum, ex quo crux eminet, tenentis (c),  
cum hac quoad litteras epigraphe: *S. Beati: OLAW'S:*  
*DE: STOAZAR: SWIO:* cuius veram lectionem, re-  
ſtitutis in suum ordinem Litteris, per Chalceographi  
ſcitantiam turbatis, hanc esse opinatur HALLBORG:  
*S. Beati Olawi de Sotaskärs wik,* quæ ſibi conſtaret,  
quod

quod notum sit, Norwegiæ Regem, OLAVUM Ha-  
raldi filium, in sanctorum numerum post cruenta fa-  
ta relatum, superasse immanem piratam *Sote*, in lo-  
eo *Sotaskär* deinceps appellato, nisi expresse legere-  
mus vocem *Svio* (*Svea*) in *Wik* sinum, pro arbitrio  
non transformandam. A probabili hujus epigraphes  
interpretatione longe recedit Cl. Tårnström; suspi-  
catur enim, OLAVUM, cuius heic fit mentio, vel Du-  
cem navalem, vel Gubernatorem Alandorum, pa-  
tria Svecum fuisse, cognominatum a suo prædio Sto-  
azar olim, nunc *Tozarby* dicto, intra Alandiæ pa-  
rœciam *Sund* sito. Enimvero tam corona capiti hu-  
jus OLAVI imposita, quam globus, quem sua ge-  
stat manu, pro indubii Majestatis insignibus omni  
habita sunt tempore. Et quum præter Norwegiæ  
Regem, OLAVUM, modo memoratum, nullus ejus-  
dem nominis Scandinaviæ Princeps albo Sanctorum  
fit insertus, ejusque ea esset veneratio, ut Alandū  
etiam in suum honorem aliquot erigerent templa,  
dubitari non potest, imaginem ejus esse, quæ in A-  
landiæ sigillo compareat. Præterea quum nomen  
*Stoazar* in antiquis nusquam occurrat monumentis,  
præsumo, illud esse corruptum, & in *Sotaskär* resti-  
tuendum. Nisi igitur valde fallor, memorata epi-  
graphe ita erit legenda: *S Beati OLAWS de Sotaskär*  
*Svio*; ultimam autem vocem *Svio* non ad Regem,  
sed ad *Sotaskär* esse referendam, colligo ex his ver-  
bis, in Historia OLAVI Sancti occurrentibus: *thað*

haust bardist Olafr ena fyrsta orosto vid Sotasker,  
thad er i Swia Skerium, thad bardist han vid Wikinga,  
oc er sa Soti nefndur er fyri them war, hoc est: pri-  
mam eo autumno pugnam conseruit OLAVUS ad So-  
taskar, quæ in maritimis Sveciæ sunt, ubi pu-  
gnam cum piratis habuit; vocabatur autem Sote,  
qui piratis præerat (d).

(a) Vid. cit. *Dissert.* p. 13.

(b) Vid. *Mappam Geogr. dissert.* sue præmissam.

(c) Habemus quoque iconem Regis OLAVI S., qualis in templo parœciæ Olofsby, contracte Ulfshy, ad Fjörneburgum cernitur, quæ ab imagine in Sigillo Alandiaæ expressa, in eo differt: quod Rex stet erectus, dextra globum sine cruce, sinistra bipennem tenens, vid. J. TOLPO *Dissert. de S. OLAVI N. R. pravo Religio-  
nis Zelo.*

(d) Vid. *Histor. Olavi Sanct.* Cap. 21.

